

那文毅公奏議

那文毅公初任直隸總督奏議卷四十一目錄

卷四十一

飭緝逆黨

附請改發邪教從犯

那文毅公初任直隸總督奏議卷四十一

男容安恭輯

飭緝逆黨

附請改發邪教從犯

嘉慶二十年六月初一日

奏爲訪獲編造邪言惑衆斂錢誘姦婦女之犯審擬具
奏事竊據保定府知府阿霖面稟據祁州知州王
仲湘稟稱訪得州屬西佛落村民人邢士魁自稱
如來轉世有聚衆念經情事臣當卽派委委員改
裝易服前往訪拏去後嗣據委員候補知縣何繼
志會同署祁州知州顧汝壽將邢士魁拏獲起出

道袍一件小木牌一塊寫天地三界十方萬靈真
宰十字小木戳一個刻洞經咒寶四篆字銅鐵磬
各一口木魚一個燒料念珠一掛破爛經卷一捆
押解來省並據泰寧鎮標外委田啟稟獲一人訊
據口稱名趙吉雲祁州西佛落村人伊村邢士魁
聚衆念經男女混襍伊怕連累欲行呈首今蒙盤
獲等語稟經泰寧鎮總兵成書發交易州訊供稟
解到省臣將邢士魁家起出經卷逐細翻閱多係
僧道念誦及紅陽教經均無違悖不法字樣惟手
寫表名掛號總冊一本冊面寫大清嘉慶十四年

二月立內中語句荒誕鄙俚不甚可解兼有人王
地主呂成羣又胡兒對對還家兩句悖逆字蹟臣
隨飭交臬司督同保定府詳細研鞫茲據該司盛
泰詳稱督同保定府知府阿霖向邢士魁逐細審
訊詎該犯善於運氣當熬審極嚴之時該犯竟能
閉目斂氣數刻形同已死難於取供飭役將火紙
點燃吹入鼻孔該犯一經煙薰方不能運氣始肯
供吐據稱伊圖惑眾斂錢姦淫婦女托名如來轉
世并與呂尹氏商允捏稱其子呂成羣係人王地
主當家地王菩薩現有金禪老祖附在呂成羣身

上某處神道某人前來表名掛號又隨便捏造人名並將平日看過小說人名一併編入造成這表名掛號總冊每於做會念經時對衆捏說某神道有功金禪老祖應許上升某神道有過金禪老祖已經不用某神道在世鬧事已經收淨故於冊內添註上升不用收淨字樣不過騙人之意其悖逆字跡亦係隨筆書寫並非有心至破爛經卷並木戳係在東佛落村廟內取來聞係該村民婦劉邱氏安放在彼木戳所刻何字伊並不認識亦未用過等語復提劉邱氏並應訊人等到案向劉邱氏

追究經卷木戳來厯據供伊姑母嫁與博野縣北
燕村人朱姓爲妻朱姓向做道士家中存有經卷
木戳後朱姓並伊姑母病故並無子嗣伊恐經卷
木戳棄毀罪過取回存放本村廟內被邢士魁看
見取去等語隨提同一千人等研審明確尙未擬
解該犯邢士魁因連日熬審兼被煙薰逆氣帶病
進監身死該司委據清苑縣驗報並將呂尹氏等
擬議解勘前來臣隨親提研鞫緣邢士魁籍隸祁
州莊農度日乾隆四十八年間邢士魁患病請望
都縣介安村人素習如意教之于正方醫治痊愈

卽拜于正方爲師入教于正方向邢士魁告知此
教起自山東商河縣董家林人董四海第二輩至
第八輩係徐名揚顧明心石龍池孫紹林黨盛符
張洪初徐大等亦均係山東人不知原籍州縣第
九輩傳至直隸博野縣北周村王紹先轉傳于正
方業已十輩會囑邢士魁做木牌一塊寫天地三
界十方萬靈真宰十字每日跪於牌前燒香口念
孝父母睦鄉里六字又教其練習坐功運氣及按
摩治病之法邢士魁學會之後與人治病有錢之
家聽憑酬謝無錢之家並不索要現獲之趙祥雲

趙凌雲趙景雲張連邢其然邢騾子邢皂兒及未
獲之張俊直等均因患病經邢士魁治好遂以師
傅相稱嘉慶十一年間邢士魁由東佛落村社廟
前經過適該村民婦劉邱氏因伊姑夫朱姓並伊
姑故絕朱姓向做道士家中存有經卷數本小木
戳一個劉邱氏恐經卷木戳棄毀攜回本村廟內
存放被邢士魁看見取回意欲惑衆斂錢遂自稱
如來轉世冀人信從并買得銅磬木魚念珠等物
於每年三月初三四月月初四六月初六九月初九
等日念經做會有平素兇邢士魁治病男婦人等

前往入會邢士魁斂得香資並無確數亦不記赴
會人名姓嘉慶十三年隣村民婦呂尹氏患病往
煩邢士魁按摩醫治邢士魁頓萌淫念遂與呂尹
氏調戲成姦迨後乘便續姦不記次數十四年二
月內呂尹氏因子呂成羣染患癱症不能動履邀
邢士魁至家醫治邢士魁聲言呂成羣筋絡拘攣
隨用木棍捶擊其兩腿呂成羣疼痛難受混叫神
道救命邢士魁起意乘機編造邪言煽惑婦女以
便斂錢圖姦隨與呂尹氏商允捏稱呂成羣本係
人王地主當家地王菩薩下凡現有金禪老祖附

在呂成羣身上某處神道前來表名掛號又隨便捏造人名並將平日看過小說中古人名一併編入湊成鄙俚語句造得邪書一本名爲表名掛號總冊邀呂元觀至呂成羣家代爲謄寫底冊當卽燒毀呂元觀並呂成羣並不知是邢士魁捏造迨後邢士魁每逢聚會念經之期對衆誣稱某神有功金禪老祖應許上升某神有過已經不用某神在世鬧事已經收淨於總冊內隨便添註上升等各項字樣希圖衆益信奉嗣有同村民人趙廷之妻趙周氏並呂元觀之妻呂胡氏望都縣民婦劉

趙氏劉鍾氏先後煩邢士魁治病內惟趙周氏一人被其誘姦不從詈罵而走其呂胡氏劉趙氏劉鍾氏均被誘姦本年三月間經該州王仲湘訪聞具稟隨委候補知縣何繼志改裝易服前往該州嚴密查拏旋據該委員會同該署州顧汝壽將邢士魁拏獲搜起經卷等件押解來省而邢士魁同村之趙吉雲因慮拖累出外欲行首告被易州外委田啟盤獲呈解奉憲鎮轉發易州稟解到省一併飭發臬司督同保定府審辦究出前情將呂尹氏等按名提解來省審訊卽據清苑縣驗報邢士

魁在監病故茲據該司將呂尹氏等按擬解勘前來經臣親提研鞫各供前情不諱並令呂元觀當堂書寫字樣與冊內筆跡比對相符究詰呂元觀呂尹氏實不知冊內有悖逆字樣嚴訊趙雲祥等亦堅供並無習教情事覆詰不移案無遁飾查邢士魁素習如意教坐功運氣雖無謀逆之心編造邪書亦止兩句悖逆之詞但始則自稱如來轉世做會斂錢繼又捏稱呂成羣係人王地主當家地王菩薩有金禪老祖附在呂成羣身上有神道前來掛號編成邪書惑衆斂錢誘姦婦女不法已極

自應從重問擬邢士魁應比照謀反大逆律凌遲處死該犯已在監病故仍行戮屍梟首示衆該犯係比照大逆問擬親屬免其緣坐呂尹氏因煩邢士魁治病被其調戲成姦嗣邀邢士魁至家爲伊子呂成羣醫病邢士魁起意編造邪言冀圖煽惑婦女數錢圖姦與該氏相商該氏輒敢應允亦屬不法惟研究並不知邢士魁所編書內有悖逆語句自應仍科左道惑人爲從之罪呂尹氏除與邢士魁通姦輕罪不議外應依左道惑人爲從例發伊犁給額魯特爲奴不准收贖呂元觀詵據供稱

並無商同邢士魁編造情事惟書內悖逆語句係該犯謄寫亦屬不法亦應從嚴懲辦呂元觀應照左道惑人爲從例發伊犁給額魯特爲奴呂胡氏劉趙氏劉鍾氏與邢士魁通姦除呂胡氏業已病故不議外劉趙氏劉鍾氏均依軍民相姦例枷號一個月杖一百犯姦之婦杖決枷贖追取贖銀入官冊報趙祥雲趙凌雲趙景雲張連邢其然邢騾子邢皂兒訊無習教情事惟因邢士魁爲伊等治病輒以師傅相稱並赴會燒香亦有不合均請照違

制律杖一百加枷號兩個月滿日各折責四十板邢士
魁平日習教燒香治病地隣並不首報亦有不合
均請照不應重律杖八十折責三十板飭令傳案
發落呂成羣係屬癱瘓因被捶擊疼痛混叫神道
救命訊無串通邢士魁編造邪言之事現在不能
動履已成篤疾應免置議首先傳教之山東商河
縣董家村人董四海及第二輩至第八輩不知原
籍州縣之山東人徐名揚等是否尙存有無傳徒
惑衆之事移咨山東巡撫轉飭商河縣并通行各
屬一體查拏究辦務絕根株王紹先于正方據邢

士魁供稱已故是否屬實仍飭該地方官查明取
結辦理餘屬無干概行省釋供招咨部謹

奏奉

硃批刑部議奏

嘉慶二十年十月二十四日

奏爲拏獲扶鸞煽惑之犯審擬具奏事竊臣於天津回
省途次接據藩司錢臻臬司盛泰清河道韓文綺
會稟十月初十日突有浙江湖州人許環至臬署
密告有現住本城伊同鄉人姜應隴爲其薦館許
環詢係何處姜應隴答稱明幼主新立遣新巡撫

陳佑儒同將軍張騰雲一共三十五人同來保定於十月初二日先到城外東高家莊大乘菴居住陳佑儒於十三日到任囑爲延薦幕友長隨伊已薦訂許環囑其換用方巾圓領往見并薦有熟識跟官之蘇州人張貴往當長隨不可洩漏等語許環以語涉悖謬恐干牽連是以密稟臬司盛泰隨卽知會藩司錢臻清河道韓文綺并傳保定府知府阿霖至署一面密飭清苑縣知縣王德棻典史費端書立將姜應隴及幫同扶鸞之范登科并張貴拏獲搜查姜應隴家並無違礙物件及不法字

跡惟有鸞盤一個鐵圈一個上紮舊筆一枝當卽
隔別審訊姜應隴供詞與許環所稟相同連夜密
飭該縣等馳往高家莊村外查得有大乘菴一座
四面並無隣居廟內僅有僧人洪廣及僱工王姓
二人訊據地隣等僉供該僧等安分守法並無外
來形迹可疑之人來往住宿查保甲冊內亦無陳
佑儒張騰雲等其人地方甚爲安靜等情馳稟前
來臣不勝詫異飛檄飭令嚴鞠確情一面馳回省
城連日督同司道等設法熬訊徹底嚴究委係妄
信鸞語毫無影響飭據保定府知府阿霖審擬由

司道解勘前來

臣

逐加嚴鞫緣姜應隴籍隸浙江

湖州府安吉縣人乾隆五十五年考入武學各處
行醫爲生父母俱故亦無弟兄嘉慶元年在江南
徐州府銅山縣屬雙溝鎮地方相遇該處人高澄
川傳授姜應隴扶鸞請鸞法術只須懸筆默禱並
無符錄卽可請鸞姜應隴於嘉慶八年秋間來至
直隸省城仍行醫道與在直遊幕之同鄉生員許
環蘇州人長隨張貴均相認識姜應隴每遇疑難
病症卽請鸞求方間有效驗遂相深信十一年娶
曾氏爲妻生子女三人俱尙幼小在省賃房居住

遷移不定二十年十月初七日甫經另搬安祥衲
衲居住並無勾結外來匪人行爲不法情事范登
科籍隸清苑於十三年間因令姜應隴治病認識
迨後范登科無處傭工家中貧難經姜應隴相邀
製配藥料僅給飯食並無工價姜應隴有時請鸞
卽令范登科幫扶鸞盤范登科並不識字不能深
知鸞語姜應隴亦從未向告二十年八月不記日
期姜應隴復因問病請鸞據稱來係唐朝人胡問
源鸞語明幼主朱姓年十三歲係浙江嘉善縣人
已在杭州登基遣巡撫陳佑儒同將軍張騰雲一

共三十五人前來保定於十月初二日先到城外
東高家莊大乘菴住下十三日到任陳佑儒尙無
幕友長隨囑其預覓數人俟其到任送入署中辦
事緣人未至不必先期往見亦不可洩漏天機並
云陳佑儒前生名姜辰卽姜應隴之故父與有夙
緣明春陳佑儒相延治病卽可往來彼之幕友長
隨皆係舊識必有照應好處姜應隴素本惑於鸞
語深信爲真九月二十六日往拜許環爲陳佑儒
代延遵從鸞語並未言明恐致洩漏十月初四日
途遇張貴又復告知已與薦定地方張貴根問何

處姜應隴空寫三四品三字囑其不可告人而散
張貴向許環告知正在懷疑而姜應隴復至許環
寓所因許環向問薦館何處姜應隴答以天機不
可洩漏而去許環張貴以姜應隴情形可疑相商
欲探明其行爲首告至初九日晚姜應隴復請鸞
查問可與許環等實告否鸞云可以實告并云新
來各官皆穿明服令許環亦更換方巾圓領服色
初十日早姜應隴前往約會許環言明薦與新巡
撫陳佑儒署中辦事又以鸞語囑許環更換服色
以待許環見姜應隴語言悖謬恐爲牽累卽赴臬

署密稟當經該司道等督同府縣立將姜應隴拏獲搜查其家並無經卷圖像符咒違悖不法物件惟有鸞盤鐵圈上紫舊筆一枝並馳往高家莊大乘菴密查住持僧人洪廣安分修行實無容留外來匪徒情事稟經臣督率提同范登科等訊晰前情不諱誠恐姜應隴實有陰謀不法重情及勾結各逃匪滋事等弊窮加研詰該犯姜應隴堅供今已過十三日並無其實事實爲鸞語所惑此時方知悔過陳佑儒等姓名係鸞上寫出該犯實沒見有陳佑儒等其人范登科及地隣等亦供姜應隴平

寫張貼當此懲辦奸匪邪惡之際猶敢以此肆意
邪言惑人若不按例嚴擬無以靖人心而懲妖邪
姜應隴除扶鸞惑人爲首律擬絞候輕罪不議外
應卽照妄布邪言煽惑人心爲首者斬立決例擬
斬立決仍梟首示衆以昭炯戒范登科曾請姜應
隴治病始與認識後因貧無工作經姜應隴相留
製藥僅給飯食姜應隴當請鸞之時亦曾令其照
料鸞盤第該犯素不識字不知鸞語並無隨從邪
言惑人情事未便竟照扶鸞爲從問擬范登科應
於遣罪上減一等杖一百徒三年至配所折責安

置傳授姜應隴扶鸞之江南銅山縣雙溝鎮人高
澄川飛咨江省查拏究辦並將供招咨部謹

奏

嘉慶二十年十月二十五日奉

旨姜應隴著卽處斬梟示餘照該督所擬完結其赴署稟
首之許環加恩賞給八品頂戴著該督傳到詢問如情
願入伍以外委補用如不願入伍卽以頂戴榮身

嘉慶二十年十一月二十一日

奏爲遵

旨嚴審定擬具奏事竊據保定府具稟東鹿縣訪獲民婦

馬楊氏等傳習紅陽教聚衆念經并楊思隴拜劉
洛謙等學習如意門等情經臣批司提省審辦一
而恭摺具奏欽奉

硃批嚴審明確從重定擬切勿寬縱欽此嗣據保定府知
府阿霖等審明定擬由臬司盛泰覆審解勘前來
經臣親提研鞫緣馬楊氏係束鹿縣民馬春之妻
馬春早經物故該氏守節度日並無產業子女伊
姑馬劉氏在日拜束鹿縣張各莊民婦靳氏爲師
入紅陽教爲第四支其餘支派馬劉氏未向馬楊
氏告知至靳氏之師王氏未詳住址與靳氏均已

故絕靳氏藏有紅陽教經卷佛像身故之後經馬
劉氏攜回馬劉氏又因伊媳馬楊氏守節無嗣令
其入教燒香誦經馬楊氏卽拜馬劉氏爲師馬劉
氏並未別有傳徒旋卽身故今已三十年嘉慶四
年七月間馬楊氏追念伊姑之師祖王氏伊姑之
師靳氏皆無後人奉祀僱覓匠人憑空爲王氏靳
氏畫像具名供奉嘉慶十二年後有李吉氏黃羅
氏大高郭氏二高郭氏楊韓氏等五人各因夫故
絕嗣無所依靠往求馬楊氏教經修善馬楊氏憐
令入教李吉氏等應允遂拜馬楊氏爲師教誦伏

魔經卷並無別項卦名咒語亦無收留男人爲徒
又楊思隴之妻劉氏於前夫李胖子故後本欲拜
馬楊氏爲師馬楊氏因其年輕恐難守節未收爲
徒迨後隣近村民因馬楊氏等認真修行如遇白
事或酬神還願卽邀馬楊氏等念經供給飯食並
未送給錢文馬楊氏又於每年六月初六日曬晾
經像李吉氏等五人前往幫同照應馬楊氏備齋
一頓此外並無聚會之事李四八子籍隸東鹿縣
賣豆腐生理伊母李劉氏曾因患病經該縣閭村
民婦曹氏醫痊曹氏亦係紅陽教李劉氏卽拜曹

氏爲師嗣曹氏故絕李劉氏將其所有經像取回
李劉氏並未傳徒旋即病故其子李四八子並未
誦經習教又楊思隴莊農度日嘉慶二十年七月
間因母房氏患病楊思隴在神前許願如母病痊
愈念經酬神九月間房氏病痊因聞馬楊氏等守
節奉佛卽於十九日往邀馬楊氏等六人攜帶經
像等物至家念經還願楊思隴又聞李四八子家
藏有經卷圖像往向李四八子借取供奉其妻楊
劉氏亦將收存母家佛像二軸一同懸掛楊思隴
之弟楊思鳳隨同禮拜至劉洛謙之妻劉韓氏因

本年四月間伊孫女丑兒患病經楊思隴之妻楊
劉氏用針挑扎醫痊適於是日與子劉清奇帶同
丑兒赴楊劉氏處謝醫楊劉氏留住喫齋卽經束
鹿縣徐濬訪問前往拏獲并搜起經像等物帶縣
訊供楊思隴妄認拜劉洛謙賈洛養學習如意門
楊二胖楊洛玉及伊妻楊劉氏均曾習教李四八
子亦妄認學習紅陽教等情稟經臣奏明提省審
辦茲據該府等審明定擬由司解勘臣親提研訊
各供前情不諱恐有串捏狡卸并與在逃各逆匪
有勾結往來知情藏匿情事究詰不移案無遁飾

查例載紅陽教及各項教會名目並無傳習咒語
但供有飄高老祖及拜師授徒者發往烏魯木齊
分別旗民當差爲奴其雖未傳徒或曾供奉飄高
老祖及收藏經卷者俱發邊遠充軍等語今馬楊
氏先從伊姑馬劉氏入紅陽教後復收李吉氏等
爲徒念誦經卷殊屬不法自應按例問擬馬楊氏
應請依紅陽教拜師授徒者發往烏魯木齊爲奴
該氏雖係婦女又年逾七旬第習教傳徒最爲風
俗人心之害應據實發配以昭炯戒李吉氏黃羅
氏大高郭氏二高郭氏楊韓氏聽從馬楊氏入紅

陽教均屬不法應於馬楊氏遺罪上減一等各杖一百徒三年該氏等聽從入教與別項犯罪不同若一律准其收贖似無以示懲儆李吉氏等五犯應請暫時監禁飭令地方官俟一二年後察看該氏等如果實心改悔再行訊取供結照例詳請收贖李四八子存留紅陽教經卷訊係伊母李劉氏生前從曹氏家取回並非該犯自行收藏平日亦未誦習與本身收藏經卷者有間自應衡情酌量問擬李四八子應請於紅陽教收藏經卷發邊遠充軍例上量減一等杖一百徒三年楊思隴到案

之時妄供劉洛謙等爲如意門教訊因畏刑所致
情尚可原惟因母病痊愈輒邀馬楊氏等至家念
經亦屬不合楊思隴應請照違

制律杖一百再加枷號一個月該犯與李四八子均已
在監病故應毋庸議楊思鳳隨同禮拜應請照不
應重律杖八十折責發落劉洛謙賈洛養楊二胖
楊洛玉楊劉氏劉清奇均無習教不法情事免其
置議輾轉傳教之靳氏王氏曹氏并楊思隴之妻
劉氏母家是否故絕飭縣開查究辦起獲經卷等
物案結銷燬供招咨部謹

奏奉

硃批刑部議奏

嘉慶二十年十一月二十五日

奏爲遵

旨嚴審定擬具奏事竊

臣

委員先後拏獲習教傳徒匪犯

吳永滿尤明一案先經

臣

訪聞派員將尤明韓可

旺等解省訊據韓可旺等僉供被地保稟首之後

業俱悔過自新訊之尤明據供伊被同縣人吳承

發誘令入教等情當經

臣

將訪拏情形具奏欽奉

硃批嚴審定擬具奏欽此嗣復究出尤明之師係名吳永

滿前供吳承發係屬錯記隨將吳永滿緝獲檄司
督同保定府確審茲據審明定擬由司勘轉前來
經臣親提研訊緣吳永滿籍隸青縣有前已犯案
發遣之吳久治係吳永滿無服族姪吳久治係祖
傳義和門離卦教嘉慶十四年吳久治勸令吳永
滿拜從爲師入教學習坐功運氣并好話歌詞吳
永滿卽收同縣人尤明爲徒尤明因窮苦難度起
意藉此惑衆漁利十五年十二月內有尤明表兄
靜海縣人韓可法適往探望尤明勸令入教卽同
至其兄韓可旺家尤明置備漁鼓簡板夜間自行

敲擊唱說好話吳永滿亦曾往幫唱數夜引誘男婦多人往聽夜聚曉散尤明陸續勸誘韓可旺韓可法范光增王士隴邊得法閭四張有芬胡永順張壘邢自宮邊赴和邊起雲張鳴鵬馬貴安幗太劉愷劉瑤高張氏等十八人拜伊爲師學唱好話各給錢文不記確數當有高張氏之婿陳五噴尤明引誘婦女入教與之爭鬧卽被該村保正劉繼先赴靜海縣稟首經該前縣錢鴻勳拘訊取具各悔過甘結責釋其時尤明並未將伊師吳永滿供出本年九月間臣赴天津審案訪聞靜海縣保正

劉繼先有稟首民人韓可旺家招接匪類習教之事恐有逆匪潛匿該處委弁常玉山帶同眼線先將劉繼先誘獲解省檄司訊出前情臣以尤明係傳教匪徒難保無怙惡不悛及另有勾結招留各逆匪等弊並恐從教之韓可旺等亦均未能斂跡當卽委員分路馳往靜海青縣將韓可旺等十八名口同尤明一併獲解訊究尤明先供伊師係吳承發並訊據韓可旺等十八人僉供前從尤明入教一經該縣責懲取結之後卽各實心改悔不復習教質之原首保正劉繼先供亦相同願具連環

互保當將韓可旺等同保正劉繼先摘釋將大概情形奏蒙

聖鑒嗣據委員查拏並無吳承發其人復監提尤明究出伊師係吳永滿前供吳承發係一時錯記又經委員馳往青縣將吳永滿同伊兄吳永興一併獲解來省查明吳永滿等家並無經卷及違悖器械字跡亦無外來面生可疑之人藏匿在家檄司提犯隔別逐細研訊各供前情不諱臣查吳永滿尤明既曾習教傳徒吳永滿所傳斷不止尤明一人尤明亦必不止轉傳韓可旺等十八人並恐該犯等

向與逆匪來往另有勾結不法及知情藏匿情事
嚴加究詰矢口不移案無遁飾查例載左道惑人
爲從發新疆給額魯特爲奴等語此案吳永滿訊
係業經犯案發遣匪犯吳久治之徒尤明又係吳
永滿之徒該犯等既自習義和門離卦教復敢輾
轉傳徒習教厥罪惟均現據訊無另有徒黨及勾
連逆匪知情藏匿情事第均訊無恒業似此同係
習教傳徒匪犯未便容留內地致滋惑衆吳永滿
尤明均應照左道惑人爲從例發遣新疆給額魯
特爲奴曾經被獲入教之韓可旺等十八名口前

經訊明實已改悔業予省釋毋庸再議吳永滿之
兄吳永興訊無隨從習教情事應請免議供招咨
部謹

奏奉

硃批刑部議奏

嘉慶二十年十二月初八日

奏爲邪教案內從犯請改發回城爲奴以杜煽惑而免
流弊恭摺具奏事竊查各項邪教爲從之犯均發
新疆給額魯特爲奴定例已極嚴明惟是此等匪
犯溺迷既深狡黠尤甚目前之管束尙易日久之

煽惑宜防誠恐在配多年故智復萌難保無私相
傳習情事惟伊犁額魯特與土爾扈特均係蒙古
平素皈依神佛於念經治病稍有法術其孽跪頂
禮倍於尋常各犯等教派本多或卽藉其皈依崇
奉之名鼓其荒謬邪罔之說乘間導誘暗長潛滋
不惟根株未絕並恐煽習轉易於新疆地方殊有
關係查回城地方大小伯克及各回子惟知誦念
回經並不敬信佛教臣會見其見有佛像畫人俱
去其眼是各項邪教之懸像念經勢必不行應請
將各項邪教案內減死從犯無論由黑龍江改發

新疆及現在發往與以後應發給額魯特爲奴之
犯均收發回城給大小伯克及力能管束之回子
爲奴回城共有八處旣足以敷發遣而資約束各
犯等雖有狡秘傳惑之伎倆亦因回子素不敬信
無所復施其煽誘似於防杜流弊之處稍有裨益
謹

奏奉

硃批刑部議奏

容安謹案習教應發人犯收發新疆旋經刑部
議准奉

硃批依議

嘉慶二十年十二月十七日

奏爲審擬具奏事竊照建昌縣附生鄒涇赴

行在刑部呈控張文富等學習天極聖教等情一案當

經審訊各供

奏明解直審辦

臣

檄司行提人證卷宗飭發確審茲據

保定府知府阿霖審明定擬由司勘轉前來

臣親

提鞠訊緣鄒涇籍隸建昌縣曾入府庠與寄居建

昌縣之山東海陽縣人黃廷訢誼屬師生嘉慶十

八年間黃廷訢開館教學張文富之子張林隨從

肄業是年黃廷訢將伊兄黃廷元薦與張文富家
傭工言明十月爲滿張文富之妻父曹明柱與已
故陰陽生李洋全并現到之村民賈萬寶李漢章
孫義張十一及未到之梁自興楊萬倉彭士寬孫
白祥孫發李希堯孫照等十三人向作善會每年
五月十三日在本村

關帝廟演戲敬神七月十五日燃放路燈念經祀孤各
出錢三五百文不等作戲價放燈之需並無婦女
在內曹明柱家供奉

關帝神像早晚焚香祈求消災延壽張文富與弟張文

有先未隨會十七年間張文富之父張義瀍染患
目疾赴廟祈禱旋即痊愈張文富張文有同父張
義瀍信爲靈驗亦相隨念經本洋全物故曹明柱
將遺存降魔捉妖咒訣及心經等項經本存貯廟
內并以敬奉

關帝至極至尊自撰天極聖教弟子曹明柱張文富等
字樣寫於經尾交給張文富令其抄錄心經及覺
世真經便於教誦張文富等各不識字轉託黃廷
訢抄錄黃廷訢以事非緊要置諸高閣至五月間
黃廷元懶於力作辭工而回張文富因正屆農忙

向黃廷訢村辱曹明柱亦斥其所薦非人致相口角黃廷訢以張文富辱及斯文先在建昌縣縣丞衙門具控未經准理黃廷訢因此不爲張文富抄錄經卷張文富亦未將經本取回迨黃廷訢繙閱經本見有天極聖教四字懷疑張文富等係屬邪教時值查拏教匪黃廷訢觸起前嫌卽以經本爲憑添捏該縣丞賄放等詞赴建昌縣呈控該前縣廣慶飭差拘拏賈萬寶之父賈永泉恐子受累央鄉約李世昌託張廷桂向黃廷訢說和黃廷訢不允張文富亦恐到案拖累央囑縣役姚廷桂等暫

緩拘傳并送給飯食錢文鞋物姚廷桂等意圖支飾捏稟張文富等不服拘拏廣慶飭委捕盜外委黃存璽往拏張文富先期外出貿易張文有張義濠亦在外工作該眷屬閉門不納正在吵嚷張文有等回歸見而逃避該外委僅獲曹明桂賈萬寶等送縣該前署縣富爾松阿查訊曹明桂不認習教原告黃廷訴亦未到案尙未定斷黃廷訴傳聞張文富等有拒捕情形疑係李世昌說和不遂因而主使適與李世昌另案涉訟之孫鐸撞遇告述前情孫鐸信口答覆黃廷訴卽以李世昌主使拒

捕在縣續控批飭併究黃廷訢復因張文富避匿
不到將所控習教拒捕情節添砌書差賄縱舞弊
等詞控經熱河道密委千總趙文德拏獲張文有
張義濬起獲經本并於各犯家內逐細搜查並無
悖逆不法字跡器械張文富逃往赤峰縣該千總
尾隨緝拏張文富見而逃逸該千總稟經熱河道
飭發承德府嵩齡訊明曹明柱等並無習教傳徒
斂錢因控關邪教犯證未齊恐尙有不實不盡將
曹明柱張義濬管押覆審旋據看役稟報曹明柱
張義濬在押病故仍催提未到之張文富等詳辦

張文富聞知伊父張義濬妻父曹明柱在押病故
心懷不甘赴府尹衙門具訴檄飭究報當經嵩齡
錄供通詳在案鄒涇聞知黃廷訴在府候審念及
師生前往探望詢問訟由黃廷訴告述前情維時
李世昌因被黃廷訴無故牽累見鄒涇與之交往
疑其主謀卽在承德府指控鄒涇唆訟鄒涇氣忿
卽照依黃廷訴歷控情節先赴都統衙門呈控檄
飭查辦此黃廷訴挾嫌誣告邪教鄒涇從而扛幫
之原委也至二十年八月間鄒涇因案未審結復
以前情并添砌承德府門丁于三刑房孟老千改

供捏詳延案不結等情自寫呈狀遣子鄒兆廊赴
行在刑部投遞訊取各供奏奉

諭旨咨解來直

臣

隨檄司飭提人卷到省查照所控情節

逐細研鞫據各供晰前情不諱恐張文富等實有
習教傳徒斂錢不法并抗官拒捕等事反覆究詰
張文富堅供伊等在廟內演戲做會放燈念經祀
孤意在敬神修善並非習教如果藉此傳徒斂錢
事屬隱密豈有將經本留與他人自取敗露亦不
知有天極聖教名目直至黃廷訴告發經承德府
提訊始知經曹明柱自撰所致委無惑衆不法追

經官差往拏慮恐到官拖累是以避匿屬實亦無
抗官拒捕情事臣以現當懲辦邪教之時誠恐張
文富等狡供避就復加刑嚇不特張文富等極口
呼冤卽隣地人等亦代剖甚力質訊黃廷訢等俱
各俯首無詞復細閱各經本俱係僧家祈禳常語
並無違悖不法字跡檢查縣役姚廷桂外委黃存
璽千總趙文德等原稟俱未載有拒捕情形其爲
黃廷訢等妄控毫無疑義查例載赴督撫按察司
官處告重事不實者發邊遠充軍又扛幫赴京告
重事不實者發近邊充軍又律載一家共犯祇坐

尊長各等語此案張文富等隨同已故陰陽生李
洋全及已獲病故之曹明柱每逢節期演戲做會
念經祀孤係爲敬神修善起見並無習教不法衆
證確鑿至經本寫有天極聖教字樣訊係曹明柱
尊奉

關帝因而撰寫並非張文富等習教名目黃廷訪因挾
口角微嫌適當查拏教匪之際砌詞疊控株累多
人固屬不法惟該犯所控究屬有因與憑空誣告
者有間自應酌量問擬黃廷訴應於赴督撫按察
司官處告重事不實發邊遠充軍例上減一等杖

一百徒三年鄒涓於黃廷訴誣控張文富等習教
本無干涉迨鄉約李世昌疑其唆訟在府控告該
犯心懷不甘并誤以習教爲真因而幫扛亦與憑
空扛幫誣告不同鄒涓應革去附生於扛幫赴京
告重罪不實發近邊充軍例上量減一等杖一百
徒三年至配所各折責四十板鄒兆廊聽從伊父
鄒涓主使抱告係一家共犯業已罪坐其父免其
置議張文富張文有等訊無習教傳徒斂錢及拒
捕等事惟惑於修善聚集多人且又有天極聖教
字樣究有不合除曹明柱張義滌業已在押病故

外張文富張文有應與隨會之賈萬寶李漢章孫
義張十一梁向興楊萬倉彭士寬孫曰祥孫發李
希堯孫照均照違制律杖一百各折責四十板所
有善會仍飭縣禁止鄉約李世昌訊無主使拒捕
及賄出縣書錢士鳳舞弊情事惟因被黃廷訴無
故連累輒疑鄒消唆混行具控亦有不合李世
昌應與猜疑捏詳向黃廷訴冒昧轉告之孫鐸均
照不應重律杖八十各折責三十板李世昌仍革
役縣役姚廷桂楊廷財奉差拘拏人犯輒敢聽騙
捏稟并收受錢物殊屬玩法姚廷桂楊進財均照

不應重律杖八十各加枷號兩個月滿日折責革役所得錢物照追入官門丁于三刑書孟老干等前經刑部提訊明確並無改供捏詳情事應與訊不知情之陳添民均免置議縣丞武鴻寶當黃廷訢具控並未准理亦無賄放情事亦無庸議仍令回任供職供招各部謹

奏奉

硃批刑部議奏

嘉慶二十一年三月初三日

奏爲查出沿習龍門教之劉龔氏等提省嚴訊先行奏

那文毅公初任直隸總督奏議

卷四十一

二天

聞事竊據藁城縣知縣包敬堂稟稱該縣張村地方有劉龔氏劉幅安母子二人沿習祖傳龍門教名目建立祠宇裝塑米氏泥像樹立龍門教碑碣廟東有米氏墳塚一址先經該縣於嘉慶十八年十二月間拏獲解省飭發保定府查訊因係前明相沿至今並非劉龔氏母子創始惟款留附近居民燒香家存經卷佛像均屬不合照違

制律各杖一百該寺房屋改爲義學該縣遵將塑像碑碣撲毀並於門首懸掛義學扁額取具劉龔氏母子改悔甘結在案本年正月二十二日該縣覆查

保甲路過張村米氏墓前見有搭蓋棚廠並錫竈
痕跡恐劉龔氏等怙過不改復萌故智密赴劉龔
氏家內查勘見伊後屋供設銅佛并畫像等件起
出銅佛大小四十二座圖像五幅鐵磬一口拜墊
一個香斗一隻又在舊書內檢出抄本經卷六頁
名九品收元卷內有卯金刀八牛江山不堅牢及
劉起豬十八家頭目出來把人殺又甲子年降聖
人三月三午時辰木子之家去爲人三甲之年龍
蛇行幽燕有災刑等語細繹語意似係明季左道
惑衆之言手摺一個內有劉門龔氏領會字樣又

有紙人四個內有紙人冒前填寫劉青二字隨傳
劉龔氏查訊驗係患病不能取供訊據鄉長米燦
然供去年正月十五三月初三等日有南冀州合
山東人到劉幅安家燒香去年七月十五日又到
米氏墳上燒紙是劉雙星搭蓋茶棚這是曉得的
劉龔氏在家供設銅佛畫像藏有手摺經卷並不
知道等語質訊劉雙星供認七月十五日劉龔氏
叫我搭蓋茶棚冀州路大青等十幾個人在墳上
獻供燒香屬實又供今年正月初一日在劉龔氏
家看見劉龔氏拜佛燒毀紙人口念咒語聽不清

楚并冀州山東人曾在劉龔氏家住宿喫飯向來
米奶奶墳上草山東人拔去治病靈驗等供訊據
劉幅安供伊母劉龔氏平素喫齋念佛是有的伊
家十二代祖母米奶奶在前明萬曆時刺封掌道
收圓老母名號現搜出經卷內卯金刀三字指劉
米氏三月三聖人出兩句係米氏是日生辰其餘
不能解說龍門教是米氏做起的米奶奶是教主
人家都稱米祖後來伊家厯代均係婦女相傳所
以伊祖母王氏人家都稱過現王母伊母龔氏人
家都稱龔母法師碑上龍門教主齋氏是伊曾祖

母自嘉慶十八年犯案之後即將銅佛等件埋藏
去年二月內伊母劉龔氏患病到十二月未愈恐
係褻瀆佛像令劉幅安刨出供奉的去年正月十
五日有冀州路連傑同他兒子路大青領着聚強
南宮等處合山東人來燒紙二月二十八日有深
州黃龍村夏洛慶王洛因合不識姓名三人到家
探望打聽官司并送蒸食款待他門酒飯住宿兩
夜三月初一日路連傑們復來燒紙各送香錢一
二百文路連傑是母親的徒弟別人都是他領來
七月十五日劉幅安外出劉龔氏央劉雙星搭蓋

茶棚供認不諱惟查出紙人據供係伊女玩耍並非龔氏焚燒之物與劉雙星供詞互異現在劉龔氏驗係患病昏迷無從質訊稟請核辦前來臣查劉龔氏母子於前次具結改悔之後明知

功令森嚴輒仍怙過不悛在家供設佛像留人款待酒飯得受香錢已屬不法且現經查出紙人一個填註劉青二字難保無另有煽惑重情自應提省審辦以儆怙惡而絕邪萌仍檄司飛提劉龔氏母子並飭拏燒香之路連傑等一千人證來省嚴訊確情以憑核辦謹

奏

嘉慶二十一年三月初七日奉

上諭那彥成奏拏獲沿習龍門教之劉龔氏等並起獲邪經等件又有紙人四個內有紙人胷前填寫劉青二字將劉龔氏等提省審辦等語劉龔氏家中起獲邪經九品收元卷內有卯金刀八半等邪詞著那彥成卽行封固送京呈覽該犯婦家中所供紙人胷前寫有劉青二字逆犯林清又名劉林恐該犯婦所供卽係林清故以劉青二字暗爲影射著那彥成向該犯婦等嚴切追究令其據實供吐毋任狡展審明後卽將劉龔氏一犯照

邪教爲首例同各餘犯分別定擬具奏

容安謹按此案 先公未及審定旋即交卸

嘉慶二十一年四月十八日

奏爲審擬具奏事竊據易州民人許添培在道旁呈控
王坦等斂錢演戲並習學說法念咒等情一案前

經臣欽遵

諭旨派委候補知府沈華旭會同易州知州金洙馳往搜
查王坦等家內並無邪書經卷集訊王坦等均係
安分良民當將查訊過大概情形繕摺奏蒙

聖鑒一面飭委該府等審辦在案茲據審明擬議由臬司

盛泰詳解前來

臣

親提研鞠緣許添培籍隸易州

住居界安村與王坦王立同村認識許添培抱養

李姓爲嗣改名許大全撫養長大給其娶妻韓氏

生子許成林嘉慶二十年十一月間許添培因家

計貧乏將許大全分出各度所有借欠親友錢七

十餘千囑令許大全認還許大全尙未歸償賬主

仍向許添培索討又該村東首有

關帝廟一座村西有城隍廟一座許添培住於村東王

坦王立住於村西城隍廟有香火地三十一畝每

年共收租錢三十一千向於三月二十八日酬神

演戲卽用此項地租上年係村人王大朋經管演戲並未減

關帝廟有香火地十五畝係許義等五家分租每畝交住持邢成租價大錢四百文因租價無多向不演戲前有乞丐王計在廟借住嗣因邢成故後王計卽行搬出許添培欲經收廟租許義等不允是以地租因循未交二十年間許添培所住村東井水乾涸伊孫許成林赴村西汲水經王坦以村東向不唱戲酬神用言刻薄許成林歸向許添培告知許添培與王坦爭吵二十一年村西城隍廟會預

議唱戲係村人李洛卓經管村衆因上年秋收豐稔欲行多唱數日公議如地租不敷使用卽在村中有餘之家按地畝派錢十文八文幫湊許添培聞知出而阻擋王坦王立村斥其非許添培益加氣忿憶及村人遇有婚葬事件俱有王立選擇日期將伊置之不理一時忿極起意控告拖累洩忿因思呈告邪說聚衆做會斂錢等事定可邀准卽使審虛伊已年老亦可免罪遂自行捏砌王坦聚衆斂錢做會王立習學說法咒語並噴許義等不將廟租交伊經收義子許大全並不給伊清還欠

賑一併書寫呈詞混入老民之內在於道旁俯伏
具呈當被站道兵丁拏獲經

行在刑部訊供奏奉

諭旨派候補知府沈華旭會同易州知州金洙前往搜查
王坦等家並無邪書經卷實係安分良民稟經

臣

覆奏一面飭委該府等審擬由司解勘據供前情
不諱究詰不移案無遁飾查律載誣告充軍者照
所誣地里遠近抵充軍役又例載左道惑人爲從
改發回城爲奴等語今許添培因伊孫許成林赴
村西汲水被王坦用言刻薄又因阻止村西唱戲

酬神復挾王坦王立村斥微嫌輒敢倚恃年老妄
冀拖累捏砌王坦聚眾斂錢做會王立習學說法
咒語等項重情混入老民之內俯伏道旁具呈情
殊刁詐其所控王坦斂錢做會事尙有因惟所控
王立習學說法咒語毫無影響如所控屬實王立
應照左道惑人爲從之例發回城爲奴今訊屬全
虛自應按例坐誣許添培應依誣告充軍者抵充
軍役律發回城爲奴年逾七旬改發雲貴兩廣極
邊煙瘴充軍不准收贖許大全經伊父許添培令
其代還欠項實因無力歸償以致復向許添培索

討並無不合應毋庸議王坦訊無斂錢起會情事
惟先因許添培之孫許成林在村西汲水用言刻
薄後因許添培出阻唱戲又不善爲理說輒與王
立將其村斥激成訟端王立並無習學說法咒語
其代人擇日例所不禁惟因許添培攔阻唱戲與
王坦向其村斥均有不合王坦王立均照不應輕
律笞四十各折責十五板王計訊無拆賣廟門許
義等亦無賴欠廟租情事均免置議無干省釋該
村城隍廟會演戲係年豐報賽風俗相沿應聽民
便供招咨部謹

奏奉

硃批刑部議奏

嘉慶二十一年五月初八日

奏爲遵

旨嚴審定擬具奏事竊照刑臺縣民人袁洛承等充當會
首於每年春分搭棚設醮僱道士董元鳳等值壇
念經唱戲聚衆斂錢致有萬人醮名目一案經臣
奏明提省審辦欽奉

硃批嚴審定擬具奏欽此當卽檄司飭提全案人卷來省
詳細跟鞠茲據臬司盛泰督同保定府阿霖等審

明定擬解勘前來

臣

親提研訊緣袁洛承籍隸邢

臺縣住居南蓋宗村莊農度曰該處隣近村莊同
有春分大醮又名龍王會每年春分在會首所住
村外搭棚張掛圖像一百六十餘軸僱道士值壇
建醮念經唱戲三天祭神祈福圖像所掛均係尋
常神佛歷年充當會首之人均係災病許願充當
因獨力不能建醮是以次年會首先於頭年會首
春分建醮之後卽迎接神像至家設席邀請隣近
村莊之人求討布施糧食每人一斗八升不等於
十一二月內斂收羅賣預備次年建醮使用會首

家閒時僅掛火神龍神圖像數軸間有所保災病男婦前往燒香有給香燈錢數文者亦有不給錢者至春分建醮時赴會燒香男女布施錢一百文以上者會首送給餽餽四枚素菜一碗醮後核算用賬不敷會首自行出錢多餘錢文周濟貧人男女俱隨此會由來已久不知起自何年何人歷年會首相傳僅有圖像兩箱共一百六十餘軸並無經卷賬單亦無師徒名分歷年建醮唱戲之時因男女往來不少遂有萬人醮之名並非在會之人所起名號嘉慶十一年會首係邢臺縣段雙樓村

人段大朋十二年係吳村人陳文富十三年係東
大樹村人董聚五十四年係西大樹村人王玉美
十五年係張家莊人張進張考十六年係任縣人
楊守仁十七年係邢臺縣人張承十八年係任縣
武生楊澄十九年係邢臺縣人王袁氏二十年係
南蓋宗村人袁懷有內張進張考二名久已物故
餘俱獲案其嘉慶十年以前之會首僅有任縣人
張吳氏一名尙存此外俱故且事已隔年遠均不
能追憶何年係屬何人其歷年值壇念經道士係
董元鳳楊信孝齊重姜夢蘭傅可興白本心等內

齊重姜夢蘭傅可興亦已病故袁洛承係因病許願欲當二十一年春分醮會首二十年春分袁懷有建醮事畢袁洛承卽將神像兩箱迎回家內預期與道士董元鳳訂定值壇言明工價大錢五千五百文四月間邀董元鳳至家念經兩日備辦素齋共請客四十餘桌求討布施十月內斂得襍糧二十四石因未到春分醮期所收襍糧尙未糶用亦未收斂錢文十一月內邢臺縣教諭冉蔚文因奉文赴鄉編查保甲聞知其事將袁洛承之姪武生袁維清傳案以聚集男女燒香存留圖像均係

犯禁之事諭令轉向告戒查禁袁維清歸向袁洛承告知袁洛承心生畏懼慮恐不將圖像燒燬難以拒絕前往燒香之人當同僱工袁大頭將神像兩箱共一百六十餘軸同董元鳳寄存在彼念經需用神像五軸一併擡出院內全行燒燬迨向董元鳳告知其事董元鳳不依索賠大錢三十千文袁洛承未允董元鳳卽以袁洛承充當萬人醮大會首斂錢聚衆等情赴順德府經歷衙門呈控當經該府岱齡飭令邢臺縣知縣陳思讓立將袁洛承等獲案搜查其家並無經卷圖像訊晰前情其

會首內惟張吳氏王袁氏承當之年適值歲收荒歉未經斂得糧食錢文次年遂未搭棚建醮春分醮期係自行出錢念經設祭一日卽將神像交出其餘會首所得布施糧食錢文並無餘剩該縣等又在道士董元鳳楊信孝白本心各所住廟內起獲經卷內間有飄高老祖真空無生等妄誕語句訊之董元鳳供稱廟內所存之天地經係伊已故師祖董一現囑令王複承所抄紅陽經亦係董一現留下獲到王複承供亦相同白本心廟內所起經懺三本據稱係伊已故師傅王符誠所留楊信

孝廟內所起經卷據供係大乘教內發遣之道士
胡進忠所留僉稱伊等平日及受僱值壇時均不
念誦此等經卷且從未翻看亦不知中有妄誕語
句並據該縣獲到因病許願欲行接充二十二年
會首之尙興義一併由順德府錄供稟經臣奏明
提省審辦復派員會同該縣前赴袁洛承等家逐
細搜查並無藏匿經卷及違禁之物又至已故會
首張進等家細加查點亦無經卷圖像等件均各
取具地隣切結連應質之王袁氏等一併解省檄
司督同審解逐細研鞫據各供認前情不諱誠恐

尚有勾結匪黨習教傳徒惑衆斂錢情事究詰至再矢口不移案無遁飾查例載各處軍民人等稱爲善友求討布施至十人以上者發近邊充軍又紅陽教及各項教會名目並無傳習咒語拜師授徒或會供奉瓢高老祖及收藏經卷者發邊遠充軍各等語此案袁洛承等所作之春分醮又名龍王會屢訊堅供係屬鄉民祈保災病許願充當會首並無習教傳徒惑衆不法等情第收藏圖像至一百六十餘軸之多既係許願酬神並不自行辦理乃復借名請客求討布施收斂糧食錢文搭棚

建醮聚集男女多人燒香致有萬人醮名曰此會
由來已久實係起自何年何人無從追究在前尙
得謂之鄉愚無知藉口係民間秋收祈報所設惟
於十八年以後屢經嚴禁各項教會袁懷有並不
將圖像早爲送官銷燬猶敢沿仍舊習做會斂錢
搭棚建醮袁洛承經官飭禁之時雖將神像全行
燒燬惟已請客斂得糧食事屬已成未便因其尙
未搭棚建醮稍存姑息自應一律懲辦以儆邪萌
查袁懷有袁洛承二犯係十八年以後會首均應
照稱爲善友求討布施至十人以上者俱發近邊

充軍例發近邊充軍至配所杖一百各折責管束
現獲嘉慶十八年以前充當會首曾經斂錢搭棚
建醮之楊澄張承楊守仁王玉美董聚五陳文富
段大朋等七犯均應於袁懷有等軍罪上量減一
等杖一百徒三年至配所各折責管束王玉美董
聚五段大朋陳文富均先後在省病故應毋庸議
楊澄係任縣武生飭縣移學查明入學年分詳革
各犯所收布施惟袁洛承斂得襍糧二十四石尙
未建醮用去照數追出入官變價冊報餘俱爲建
醮用盡無存且無確數應免着追張吳氏王袁氏

亦曾承當會首因時值歲歉並未斂得布施次年
亦未搭棚建醮應與因病許願認充二十二年會
首尚未承當之尙興義亦於袁懷石等軍罪上減
一等杖一百徒三年張吳氏王袁氏均係年老婦
女照例收贖尙興義發配折責充徒道士董元鳳
楊信孝白本心受僱與會首建醮值壇念經訊止
得受工價惟所住廟內起獲抄寫之天地經刻板
紅陽經等項經卷內有飄高老祖真空無生等項
妄誕語句雖訊係已故道士董一現等遺留該犯
等並未傳誦亦不知其中語有妄誕第並不銷燬

輒敢存留收藏殊屬不法董元鳳楊信孝白本心
三犯均應照各項教會名目並無傳習咒語拜師
授徒或曾供奉飄高老祖及收藏經卷者發邊遠
充軍例均發邊遠充軍至配所杖一百各折責管
束董元鳳因被袁洛承燒燬其寄存念經神像索
賠不遂是以赴官架詞呈控並非自首所行軍罪
應不准其減免道士王復承訊未值壇念經廟內
亦無存有違悖經卷第曾聽從已故道士董一現
抄寫妄誕天地經一本亦屬不法王復承應於董
元鳳等軍罪上量減一等杖一百徒三年至配所

折責四十板起獲經卷案結銷燬武生袁維清一
聞儒學傳諭收存圖像做會事屬犯禁卽轉向伊
叔袁洛承告知燒燬神像與幫同燒燬之袁大頭
均無不合應毋庸議刑臺縣失察村民做會建醮
一經控發立將案犯全獲究辦並會同委員候補
知縣馮鈺順德府經歷胡栩起獲案外妄誕經卷
功過足以相抵應請免議全案供招咨部謹

奏奉

硃批刑部議奏

嘉慶二十一年六月二十六日

奏爲遵

旨嚴審定擬具奏事竊查灤州民人裴景義等聽從逸犯
陳攻玉傳習三元教轉傳徒一案先經該州訪
獲裴景義等並搜起違禁圖卷稟經臣奏明提省
審辦欽奉

硃批嚴審從重定擬具奏欽此當將提到各犯檄司飭發
首府隔別確訊究明爲首之鄭攻玉係陳攻玉並
非姓鄭在冀州南宮縣屬之桑園村居住嗣據查
明桑園村係在山東臨清州境內又分別咨緝並
派員訪拏陳攻玉弋獲無期先就現犯審擬由臬

司解勘前來臣親提研訊緣裴景義籍隸灤州行
醫度日與在逃之陳攻玉先未認識嘉慶十三年
不記月日裴景義之族叔裴元端引領陳攻玉至
村與裴云布醫眼旋即痊愈陳攻玉卽勸現獲之
裴景義並在逃之裴元端裴元通裴元幅裴振兩
及先存今故之裴云布裴元和邢良學習三元教
聲稱日久功深可以長生不老裴景義等向詢陳
攻玉卽以每年正月十五日爲上元七月十五日
爲中元十月十五日爲下元每逢會期上供燒香
磕頭念咒坐功運氣遇事須從仁義禮智體貼不

可爲匪作惡上人學成時成仙得道中等人學成時却病延年下等人學成時消災免難等語向告裴景義希圖成仙得道與裴元端等均拜陳攻玉爲師陳攻玉教給鄙俚咒語並以眼耳口鼻爲東西南北四大門及運氣之法先用手向臉上一摸閉目捫口氣從胷腹下行運仍從鼻子放出又戒以上供運氣時不可令人窺見致無好處裴景義等聽信學習陳攻玉當卽他往裴景義隨陸續傳授現獲之董槐性張培許聰熊幅榮張信劉棟張吉歐陽先并張培之妻張許氏許聰之妻許李

氏熊幅榮之妻熊崔氏以及在逃未獲之該州人
趙全高鵬程楊昆楊前劉文重熊廷雲吳城趙榮
袁思忠王士純爲徒勸令學好教以運氣迨裴景
義復先後勸已獲之錢亮拜裴云布爲師高法拜
陳攻玉爲師裴云布復自收錢步雲爲徒裴景義
之徒董槐性亦收現獲之白尙清白尙友解連彪
胡起用胡起才解潮清米萬並在逃之白尙明胡
廷良朱紅青爲徒張培亦收現獲之張景李丙瑞
于太起于太書于坡劉宗士王廷弼杜殿臣楊現
並已故之于卜爲徒在逃之趙全亦收現獲之劉

文闔敬仁解連會解成仁解秉謙爲徒高鵬程亦收現獲之馬林爲徒裴景義董槐性張培趙全高鵬程許聰並裴元端裴云布裴元和裴元幅裴振雨邢良每逢會期均赴裴元通家湊出錢文交裴云布買備素供恐被外人看見俟至夜晚燒香上供習念咒語供畢分食坐功運氣其餘尋常日期裴景義等或三五人聚在一處或各人在家學習運氣並無一定裴景義之子裴玉祥見而隨同運氣並未拜師習咒至不願隨會各犯裴景義等亦未相邀陳攻玉每年會至一次臨行時裴景義等

送給盤費多少不等十八年十月十五日陳攻玉
復至在許聰家住歇向許聰裴景義告以現拏邪
教嚴緊恐被外人識破伊已捏改王姓並熱河住
址囑咐不可聲張許聰裴景義各湊給盤費而去
嗣裴云布裴元和邢良先後病故二十年十一月
初間經該州訪聞密稟會同委員先後拏獲裴景
義等並在裴景義家起獲違禁抄本推背圖二本
萬法歸宗一本訊係得自已故之裴雲鴻等家稟
由臣奏明提省審辦行司飛提來省訊明首犯陳
攻玉實係山東臨清州桑園村人節次咨緝未獲

現犯未便久羈自應先行審擬提訊裴景義等據各供悉前情不諱恐尙有煽誘惑衆重情覆加究詰據該犯等堅供僅止習教傳徒希冀成仙得道委無煽誘惑衆姦淫婦女及謀爲不法情事亦不認識祝現等逆犯嚴究不移案無遁飾查例載傳習白陽白蓮八卦等邪教習念荒誕不經咒語拜師傅徒惑衆者爲首擬絞立決爲從發新疆給額魯特爲奴坐功運氣者杖八十等語此案裴景義拜從在逃之陳攻玉爲師傅習三元會邪教習念鄙俚咒語上供週氣訊非白陽白蓮八卦等名目

惟現值

功令森嚴之時各項教會均干嚴禁輒敢傳徒惑衆藉圖斂錢在逃之首犯陳攻玉獲日應卽從重依傳習白陽等教之例擬絞裴景義聽從學習傳徒多人董槐性張培係裴景義之徒又各轉傳多人厥罪惟均應卽一例問擬裴景義董槐性張培均合依傳習白陽白蓮八卦等邪教習念荒誕不經咒語拜師傳徒惑衆者爲從發新疆給額魯特爲奴照新例改發回城給大小伯克及力能管束之同子爲奴許聰拜從裴景義爲師尙未傳徒惟隨同

念咒且會醫在逃之楊昆拜從裴景義爲師亦屬
不法許聰應於裴景義等遣罪上量減一等杖一
百徒三年至配所折責安置陳攻玉之徒高法裴
景義之徒熊幅榮張信劉棟張吉歐陽先張許氏
許李氏熊崔氏裴云布之徒錢亮錢步雲董槐性
之徒白尙清白尙友解連彪胡起用胡起才解潮
青宋萬張培之徒張景李丙瑞于太起于太書于
坡劉宗士王廷弼杜殿臣楊現趙全之徒劉文閣
敬仁解連會解成仁解秉謙高鵬程之徒馬林並
裴景義之子裴玉祥訊明僅止坐功運氣並無習

念經咒亦未傳徒應各依坐功運氣例各杖八十
折責三十板劉棟年逾七旬許氏許李氏熊崔
氏係婦女均照律收贖追取贖銀入官冊報在逃
之首犯陳攻玉及從犯裴元端等嚴飭勒緝務獲
另結裴云布裴元和邢良于卜先已病故應毋庸
議裴景義家起獲抄本推背圖二本訊明實係得
自己故之裴雲鴻家無從根究咨送軍機處查銷
其萬法歸宗一本尙無違礙應俟案結銷燬再現
奉

上諭嗣後各直省遇有倡立邪教惑眾騙錢案內應行發

遣之犯著該督撫於審擬定案時酌留一二名於該省
犯事地方永遠枷號示衆欽此應請將爲從擬遣情節
較重之裴景義一犯留於犯事地方永遠枷號以
示儆戒至此案係該州知州王仲湘訪聞拏獲多
名解省審辦失察職名應免開叅供招咨部謹
奏奉

硃批刑部議奏

那文毅公初任直隸總督奏議卷四十一